

**Apeqquuteqaat tunngavigalugu oqallittoqarnissaanik siunnersuut, qanoq iliornikkut aalisartunut piniartunullu atortuminnik piniutiminnillu ajunaarnersuaqartillugu annaasaqarsimasunut pisortaniit ikiorsiisarnerup nukittorsarneqarsinnaanera pillugu.**  
(Inatsisartunut ilaasortaq Anthon Frederiksen, Partii Naleraq)

INDGÅET

29 APR. 2015

**Akissuteqaat**

(Aalisarnermut, Piniarnermut Nunalerinermullu Naalakkersuisoq)

Siullermik aallarniillunga Inatsisartunut ilaasortaq Anthon Frederiksen qutsavigiumavara suliaq una imaannaanngitsoq maani Inatsisartuni oqallisissiarimmagu.

Soorlu § 37 tunngavigalugu apeqquuteqaammur nr. 2014/196-imut akissuteqaammii atuarneqarsinnaasoq, aamma Inatsisartunut ilaasortaq Anthon Frederiksenip siunnersuuteqarnerminut tunngavilersuummini oqaatigigaa, pinngortitami ajunaarnersuaqartillugu annaasaqarnermut atatillugu aalisartut piniartullu aningaasatigit annaasaqarsimagunik periarfissaqarluareersut.

Aningaasarsiutigisap naqqinneqarnissaanut ikiorsiivigineqarnissamut periarfissaq eqqarsaatigalugu, oqaatigineqassaaq angallatit, umiatsiaaqqat atortullu ajornanngitsumik sillimmaserneqarsinnaammata. Atortut sillimmaserneqarsimappata imaluunniit sillimmasiisarfik aqutitigalugu sillimmasiinissaq periarfissaappat, taava pisortanit tapiiffigineqartariaqassanngikkaluarput. Taamaassappammi tapiissutigineqartut sillimmasiinissamut pisortanit tapiissutitut atorneqalersinnaammata. Tamannali naleqqutinngilaq inunnummi ataasiakkaanut ilaqtutanut inuussutissarsiummullu akisussaaffimmik tiguserusunnginnermut tamanna patsisilersuutaalersinnaammata.

Tamatuma saniatigit aalisartut piniartullu innuttaasutut allatulli tassanngaannartumik pisariaqavissumik ikiortariaqalernerimi imaluunniit pilersuinissamut aningaasartuutinullu aalajangersimasunut aningaasartuutinullu ataasiakkaanut tamatumuuna inatsisitigit piimasaqaatigineqartut naammassineqarsimatillugit pisortanit ikiorsiissutinik qinnuteqarsinnaapput.

Tamanna tunngavigalugu Naalakkersuisut isumaqarput, pissutsit eqqarsaatigalugit maannangaaq inatsisit atuuttut iluani naammattumik periarfissaqareersoq.

Taamatut oqaaseqarlunga § 37 tunngavigalugu apeqquuteqaammur nr. 2014/196-imut akissuteqaatigisakka innersuussutigalugit Naalakkersuisut sinnerlugit siunnersuut Inatsisartunut oqallisigisassanngortippara.